

# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

## ՀԱՅՏԱՐԱՐՈՒԹՅՈՒՆ

### ԲՈՂՈՔԻ ՆԵՐԿԱՅԱՑՄԱՆ ՎԵՐԱԲԵՐՅԱԼ

**Բողոքի ծածկագիրը և ամսաթիվը՝** ԳԲՔԱ-ԼՕ-2022/19, 10.02.2022թ.

**Բողոք բերող անձ՝** «Լեյկո» ՍՊԸ

**Պատվիրատու՝** «Հոգեկան առողջության պահպանման ազգային կենտրոն» ՓԲԸ

**Գնման ընթացակարգի ծածկագիրը՝** ՀԱՊԱԿ-ԳՀԱՊՁԲ-22/06

**Գնման առարկան՝** բժշկական նշանակության ապրանքների ձեռքբերում

**Բողոքի պահանջը՝** պարտավորեցնել «ՀԱՊԱԿ-ԳՀԱՊՁԲ-22/06» ծածկագրով ընթացակարգի գնահատող հանձնաժողովին՝

1. մասնակի փոփոխել 26.01.2022թ թիվ 4 արձանագրությունը,
2. մասնակի փոփոխել պայմանագիր կնքելու մասին որոշումը,
3. չկայացած հայտարարել «ՀԱՊԱԿ-ԳՀԱՊՁԲ-22/06» ծածկագրով գնման ընթացակարգի 10-րդ չափաբաժինը:

**ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ՝ Լ. ՕՀԱՆՅԱՆ  
ՔԱՐՏՈՒՂԱՐ՝ Ռ. ՄԿՐՏՉՅԱՆ**

**Նիստերին կարելի է առցանց հետևել <https://www.e-gov.am/gnumner/> հղումով.**

Տեղեկացնում ենք, որ «Գնումների մասին» ՀՀ օրենքի՝

- 50-րդ հոդվածի 10-րդ մասի համաձայն՝ յուրաքանչյուր անձ, որի շահերը խախտվել են կամ կարող են խախտվել բողոքարկման հիմք ծառայած գործողությունների արդյունքում, իրավունք ունի մասնակցելու բողոքարկման ընթացակարգին՝ մինչև բողոքի վերաբերյալ որոշում ընդունելու ժամկետը գնումների հետ կապված բողոքներ քննող անձին ներկայացնելով համանման բողոք: Նույն հոդվածի համաձայն՝ բողոքարկման

ընթացակարգին չմասնակցած անձը գրկվում է գնումների հետ կապված բողոքներ քննող անձին համանման բողոք ներկայացնելու իրավունքից,

- 51-րդ հոդվածի 1-ին մասի համաձայն՝ գնումների հետ կապված բողոքներ քննող անձին ներկայացված բողոքն ինքնաբերաբար կասեցնում է գնման գործընթացը՝ նույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքարկման վերաբերյալ ընդունված որոշման՝ տեղեկագրում հրապարակման օրը ներառյալ:

## ՀՀ գնումների հետ կապված բողոքներ քննող անձին

Բողոք բերող անձ՝ «ԼԵՑԿՈ» ՍՊԸ  
ՀՎՀՀ՝ 01224924, պետական գրանցման համարը՝ 271.110.01967  
Գտնվելու վայրի հասցե՝ ք. Երևան, Ֆուչիկի փ. 27 14  
Տնօրեն՝ Գագիկ Ալեքսանյան  
Էլ. փոստի հասցե՝ leykofarm@gmail.com

«ՀԱՊԱԿ-ԳՀԱՊԶԲ-22/06» ծածկագրով գնանշման հարցման ընթացակարգի Պատվիրատու՝ «Հոգեկան առողջության պահպանման ազգային կենտրոն» ՓԲԸ  
Հասցե՝ ք. Երևան, Նուբարաշեն 1/3

### ԲՈՂՈՔ

#### 1. Գործի նախապատմությունը.

«Հոգեկան առողջության պահպանման ազգային կենտրոն» ՓԲԸ-ի կողմից 10.01.2022թ.-ին հայտարարվել է «ՀԱՊԱԿ-ԳՀԱՊԶԲ-22/06» ծածկագրով գնանշման հարցման ընթացակարգ: Նույն ընթացակարգի գնման առարկաների ցանկում, ի թիվս այլնի, եղել է նաև «Ալկոզել 500մլ» (չափաբաժնի համարը՝ թիվ 10), որն իրենից ներկայացնում է ախտահանիչ միջոց:

Վերոնշյալ չափաբաժնի համար գնային առաջարկ է ներկայացրել նաև բողոքաբեր «ԼԵՑԿՈ» ՍՊԸ-ն (այսուհետ՝ Ընկերություն):

Հիշյալ ընթացակարգի գնահատող հանձնաժողովի քարտուղար Միհրան Համբարձումյանի կողմից 21.01.2022թ.-ին էլեկտրոնային եղանակով ծանուցում է ստացվել առ այն, որ «ՀԱՊԱԿ-ԳՀԱՊԶԲ-22/06» ծածկագրով գնման ընթացակարգի բոլոր մասնակիցները հրավիրվում են գների նվազեցման շուրջ միաժամանակյա բանակցությունների, որը տեղի կունենա սույն թվականի հունվարի 26-ին ժամը 15:00-ին ք. Երևան, Նուբարաշեն 1/3 հասցեում: Հրավիրված բանակցություններին մասնակցել է նաև Ընկերության ներկայացուցիչը՝ ներկայացնելով Ընկերության կողմից գնման ներկայացված ապրանքի (ալկոզելի) անվտանգությունը հաստատող փաստաթուղթը՝ ««Լեյկոսեպտ» մաշկային հականեխիչ ախտահանիչ միջոցի կիրառման հրահանգը հաստատելու մասին» ՀՀ առողջապահության նախարարի 06.10.2020թ.-ի թիվ 3494-Լ հրամանը, և գնային առաջարկը:

09.02.2022թ.-ին տեղեկագրում հրապարակվել են «ՀԱՊԱԿ-ԳՀԱՊԶԲ-22/06» ծածկագրով գնանշման հարցման ընթացակարգի գնահատող հանձնաժողովի (այսուհետ՝ գնահատող հանձնաժողով) նիստերի 17.01.2022թ.-ի թիվ 2, 21.01.2022թ.-ի թիվ 3 և 26.01.2022թ.-ի թիվ 4 արձանագրությունները, ինչպես նաև պայմանագիր կնքելու որոշման մասին հայտարարությունը, որով **անգործության ժամկետ է սահմանվել մինչև 12.02.2022թ.-ը ներառյալ:**

Գնահատող հանձնաժողովի 26.01.2022թ.-ի որոշմամբ (արձանագրություն թիվ 4) «ՀԱՊԱԿ-ԳՀԱՊԶԲ-22/06» ծածկագրով գնանշման հարցման ընթացակարգի 10-րդ չափաբաժնի մասով ընտրված մասնակից է ճանաչվել «Վան-Չարտեր» ՍՊԸ-ն, որը չէր

**ներկայացրել իր կողմից գնման ներկայացված ապրանքի (ալկոհոլի) անվտանգությունը հաստատող փաստաթուղթ:**

Վերորգրյալի հիման վրա ներկայացնում ենք սույն բողոքը ներքոնշյալ փաստական և իրավական հիմքերի ու պահանջի վերաբերյալ:

***2. Բողոքի փաստական և իրավական հիմքերը, հիմնավորումները և պահանջը.***

Ինչպես արդեն նշեցինք, «ՀԱՊԱԿ-ԳՀԱՊԶԲ-22/06» ծածկագրով գնանշման հարցման ընթացակարգի (այսուհետ՝ Ընթացակարգ) 10-րդ չափաբաժնի մասով ընտրված մասնակից է ճանաչվել «Վան-Չարտեր» ՍՊԸ-ն, որը չէր ներկայացրել իր կողմից գնման ներկայացված ապրանքի (ալկոհոլի) անվտանգությունը հաստատող փաստաթուղթ: Հատկանշական է, որ «Վան-Չարտեր» ՍՊԸ-ին Ընթացակարգի 10-րդ չափաբաժնի մասով ընտրված մասնակից ճանաչելու մասին գնահատող հանձնաժողովի 26.01.2022թ.-ի որոշումը (արձանագրություն թիվ 4) տեղեկագրում հրապարակվել է 09.02.2022թ.-ին:

Սույն բողոքով Ձեր ուշադրությունն ենք հրավիրում Ընթացակարգի շրջանակներում գնահատող հանձնաժողովի կողմից ընթացակարգային ինպերատիվ կանոնների պահպանվածության, ինչպես նաև «Վան-Չարտեր» ՍՊԸ-ին Ընթացակարգի 10-րդ չափաբաժնի մասով ընտրված մասնակից ճանաչելու մասին որոշման և դրանով պայմանավորված՝ վերջինիս հետ պայմանագիր կնքելու որոշման իրավաչափության հարցերին:

Անդրադառնալով բարձրացված առաջին հարցին՝ նշենք հետևյալը: ՀՀ կառավարության 04.05.2017թ.-ի թիվ 526-Ն որոշման թիվ 1 հավելվածի 40-րդ կետի 5-րդ կետի համաձայն՝ հանձնաժողովը հրավերի պահանջների նկատմամբ բավարար գնահատված հայտեր ներկայացրած մասնակիցներից որոշում և հայտարարում է ընտրված և հաջորդաբար տեղեր զբաղեցրած մասնակիցներին: Ապրանքների գնման դեպքում հանձնաժողովը գնահատում է նաև ներկայացված ապրանքի ամբողջական նկարագրերի համապատասխանությունը հրավերի պահանջներին: Առաջարկված նվազագույն գների հավասարության դեպքում, կամ եթե ոչ գնային պայմանները բավարարող գնահատված հայտեր ներկայացրած բոլոր մասնակիցների ներկայացրած գնային առաջարկները գերազանցում են տվյալ ընթացակարգի շրջանակում գնվելիք ապրանքների, աշխատանքների կամ ծառայությունների գնման հայտով սահմանված գինը կամ **գնումն իրականացվում է օրենքի 15-րդ հոդվածի 6-րդ մասի հիման վրա՝**

ա. ընտրված և հաջորդաբար տեղեր զբաղեցրած մասնակիցներին որոշելու նպատակով հանձնաժողովի նիստում առաջարկված գների նվազեցման նպատակով ոչ գնային պայմանները բավարարող գնահատված բոլոր մասնակիցների հետ վարվում են միաժամանակյա բանակցություններ, եթե նիստին ներկա են բոլոր մասնակիցները (համապատասխան լիազորություն ունեցող ներկայացուցիչները),

բ. **հակառակ դեպքում հանձնաժողովի նիստը կասեցվում է**, և մեկ աշխատանքային օրվա ընթացքում գնահատող հանձնաժողովի քարտուղարը բավարար գնահատված բոլոր մասնակիցներին էլեկտրոնային ձևով միաժամանակ ծանուցում է գների նվազեցման շուրջ միաժամանակյա բանակցությունների վարման օրվա, ժամի և վայրի մասին, (...):

Նույն հավելվածի 43-րդ կետի համաձայն՝ **հայտերի բացման և գնահատման նիստի ավարտից հետո ոչ ուշ, քան հաջորդող աշխատանքային օրը** հանձնաժողովի քարտուղարը՝

1) հայտերի բացման և գնահատման նիստի արձանագրության բնօրինակից արտատպված (սկանավորված) տարբերակը և սույն կարգի 32-րդ կետի 25-րդ ենթակետի հիման վրա ստացված հիմնավորումների քննարկման ամփոփաթեթը, որը պարունակում է տեղեկություններ նաև հիմնավորումները ստանալու ամսաթվի և էլեկտրոնային փոստի հասցեների վերաբերյալ, հրապարակում է տեղեկագրում: Եթե հիմնավորումներ չեն ներկայացվել, ապա հանձնաժողովի նիստի արձանագրության մեջ դրա մասին կատարվում են համապատասխան նշումներ: Ընդ որում, հանձնաժողովի նիստի արձանագրության մեջ մանրամասն նկարագրվում են արձանագրված անհամապատասխանությունները և դրանցով պայմանավորված հայտերի մերժման հիմքերը:

2) իր և գնահատող հանձնաժողովի՝ հայտերի բացման նիստին ներկա անդամների կողմից ստորագրված շահերի բախման բացակայության մասին հայտարարությունների բնօրինակներից արտատպված (սկանավորված) տարբերակները հրապարակում է տեղեկագրում, բացառությամբ սույն կարգի 23-րդ կետի 4-րդ ենթակետով հաստատված ցանկի 1-ին, 2-րդ, 3-րդ, 4-րդ և 20-րդ կետերի հիման վրա կատարվող գնումների: Գնահատող հանձնաժողովի այն անդամները, ովքեր հանձնաժողովի աշխատանքներին մասնակցում են հայտերի բացման նիստից հետո հրավիրվող նիստերին, ստորագրում են սույն ենթակետում նախատեսված հայտարարությունները, որոնք տեղեկագրում քարտուղարը հրապարակում է ստորագրմանը հաջորդող աշխատանքային օրը:

Սույն գործով գնահատող հանձնաժողովի կողմից գումարվել է հայտերի բացման և գնահատման թվով 3 նիստ՝ 17.01.2022թ.-ին (թիվ 2 արձանագրություն), 21.01.2022թ.-ին (թիվ 3 արձանագրություն) և 26.01.2022թ.-ին (թիվ 4 արձանագրություն): Առաջին երկու նիստերի ժամանակ որոշումներ են կայացվել դրանք կասեցնելու մասին՝ մի դեպքում որոշ մասնակիցների ներկայացրած փաստաթղթերը հրավերի պահանջներին համապատասխանեցնելու համար, մյուս դեպքում՝ գների նվազեցման շուրջ միաժամանակյա բանակցություններ վարելու համար նոր նիստ հրավիրելու նպատակով: Վերջին նիստը տեղի է ունեցել 26.01.2022թ.-ին, որի ժամանակ էլ հենց ավարտվել է հայտերի բացման և գնահատման՝ գնահատող հանձնաժողովի նիստը: Սակայն, ի հեճուկս վերոնշյալ իմպերատիվ պահանջի առ այն, որ գնահատող հանձնաժողովի՝ **հայտերի բացման և գնահատման նիստի ավարտից հետո ոչ ուշ, քան հաջորդող աշխատանքային օրը** հանձնաժողովի քարտուղարը հայտերի բացման և գնահատման նիստի արձանագրության բնօրինակից արտատպված (սկանավորված) տարբերակը հրապարակում է տեղեկագրում, սույն գործով գնահատող հանձնաժողովի 26.01.2022թ.-ի նիստի թիվ 4 արձանագրությունը դրան նախորդած այլ նիստերի արձանագրությունների հետ մեկտեղ սահմանված ժամկետում, այսինքն՝ ամենաուշը 27.01.2022թ.-ը ներառյալ, չի հրապարակվել տեղեկագրում, այլ հրապարակվել է միայն 09.02.2022թ.-ին, այն էլ ոչ բնօրինակից արտատպված (սկանավորված) տարբերակով (հրապարակվել են պատճեններից սկանավորված տարբերակները): Թույլ տրված խախտումներն ակնհայտորեն սովբերում են Ընթացակարգի շրջանակներում ընդունված որոշումների իրավաչափությունը և անհրաժեշտաբար պետք է ստանան իրենց իրավական

գնահատականը՝ արտահայտված Ընթացակարգի 10-րդ չափաբաժնի մասով գնահատող հանձնաժողովի 26.01.2022թ.-ի նիստի (թիվ 4 արձանագրություն) որոշումը դադարեցնելով և Ընթացակարգն այդ չափաբաժնի մասով չկայացած հայտարարելով:

Վերոգրյալից բացի, նշենք նաև, որ Ընթացակարգի 10-րդ չափաբաժնի մասով «Վան-Չարտեր» ՍՊԸ-ին ընտրված մասնակից ճանաչելու մասին գնահատող հանձնաժողովի 26.01.2022թ.-ի նիստի (թիվ 4 արձանագրություն) որոշումն իրավաչափ չէ նաև ներքոնշյալ հիմքերով և պատճառաբանությամբ: Ընթացակարգի 10-րդ չափաբաժնով, որպես գնման առարկա, սահմանվել է «Ալկոզել 500մլ», որն իրենից ներկայացնում է ախտահանիչ միջոց:

ՀՀ օրենսդրությամբ և դրա մաս կազմող այլ իրավական ակտերով կարգավորվել են ախտահանիչ միջոցներին և դրանց շրջանառությանը վերաբերող պահանջները: Մասնավորապես, ՀՀ կառավարության 01.08.2019թ.-ի թիվ 1009-Ն որոշմամբ Հայաստանի Հանրապետությունում գործողության մեջ դրված Եվրասիական տնտեսական միության (Մաքսային միության) հանձնաժողովի 28.05.2010թ.-ի թիվ 299 որոշման 2-րդ բաժնի կարգավորումների համաձայն՝ **ախտահանիչ**, միջատասպան (դեզինսեկցիոն) և կրծողասպան (դեռատիզացիոն) միջոցների (կենցաղում, բուժական-պրոֆիլակտիկ հիմնարկություններում և այլ օբյեկտների համար կիրառելու նպատակով (բացի անասնաբուժության մեջ կիրառվող միջոցներից և ռեպելենտ միջոցներից, որոնք դասվում են արդյունաբերական արտադրության պայմաններում օգտագործվող՝ կենսաբանական գործոնների (միջատների) ազդեցությունից անհատական պաշտպանության մաշկաբանական միջոցների դասին)) ներմուծումը և **շրջանառությունն իրականացվում է** Եվրասիական տնտեսական միության մաքսային սահմանին և Եվրասիական տնտեսական միության մաքսային տարածքում պետական սանիտարահամաճարակաբանական վերահսկողության (հսկողության) անցկացման կարգի 17-րդ և 30-րդ կետերին համապատասխան՝ **դրանց անվտանգությունը հաստատող փաստաթղթի առկայության դեպքում:**

ՀՀ առողջապահության նախարարի 10.09.2015թ.-իվ թիվ 48-Ն հրամանով հաստատված հավելվածի 20-րդ կետի համաձայն՝ ախտահանման, մանրէազերծման, գործընթացներում օգտագործվող նոր ախտահանիչ նյութերը, բժշկական արտադրատեսակները, բժշկական տեխնիկական ունենում են Հայաստանի Հանրապետության օրենսդրությամբ սահմանված, անվտանգությունը հաստատող փաստաթղթեր և մակնշում՝ համաձայն Հայաստանի Հանրապետության կառավարության 2019 թվականի օգոստոսի 1-ի թիվ 1009-Ն որոշման և Հայաստանի Հանրապետության առողջապահության նախարարի 2014 թվականի հուլիսի 3-ի թիվ 48-Ն հրամանի պահանջների:

ՀՀ առողջապահության նախարարի 07.05.2014թ.-ի թիվ 17-Ն հրամանով հաստատվել են **«Ախտահանիչ, միջատասպան և կրծողասպան միջոցներին ներկայացվող սանիտարահամաճարակաբանական և հիգիենիկ պահանջներ» N-2.1.7.006-14 սանիտարական կանոնները և նորմերը** (տե՛ս նույն հրամանի հավելվածը, այսուհետ՝ Հավելված): Հավելվածի 2-րդ կետի 3-րդ ենթակետով սահմանվել է *«Ախտահանման միջոցներ» հասկացությունը, այն է՝ քիմիական և կենսաբանական միջոցներ, որոնք նախատեսված են ախտահանման (ախտահանիչ միջոցներ), նախամանրէազերծման մաքրման, մանրէազերծման*

(մանրէագերծման միջոցներ), միջատասպան (միջատասպան միջոցներ), կրծողասպան (կրծողասպան միջոցներ) համար, ինչպես նաև վանող նյութեր (ռեպելլենտներ) և ոչլասպան միջոցներ: Նույն Հավելվածի 3-7-րդ կետերով սահմանվել են ախտահանման միջոցներին ներկայացվող պահանջները, **Հավելվածի 11-րդ կետի 1-ին ենթակետով սահմանվել է ախտահանիչ միջոցների ախտահանաբանական փորձաքննության իրականացման իմպերատիվ պահանջ**, հաջորդիվ սահմանվել են ախտաբանական փորձաքննության սկզբունքները, այն եզրափակող փորձագիտական եզրակացությանը, ինչպես նաև ախտահանիչ միջոցների փաթեթավորմանը և մակնշմանը ներկայացվող պահանջները (տե՛ս Հավելվածի 8-16-րդ կետերը):

«Հայաստանի Հանրապետության բնակչության սանիտարահամաճարակային անվտանգության ապահովման մասին» ՀՀ օրենքի 4-րդ հոդվածի 1-ին և 2-րդ մասերի համաձայն՝

Սանիտարական կանոնները և հիգիենիկ նորմատիվները (հետագայում՝ սանիտարական կանոններ) սահմանում են բնակչության համար շրջակա միջավայրի անվտանգության և ոչ վնասակարության չափանիշներն ու մարդու կենսագործունեության համար բարենպաստ պայմանների ապահովման պահանջները:

**Սանիտարական կանոնների կատարումը պարտադիր է բոլոր պետական մարմինների, ձեռնարկությունների, հիմնարկների, կազմակերպությունների, ինչպես նաև պաշտոնատար անձանց և քաղաքացիների համար:**

Ամբողջ վերոգրյալից հետևում է, որ ախտահանիչ միջոց հանդիսացող արկղերը կարող է շրջանառության մեջ դրվել, օգտագործվել բացառապես այն դեպքում, երբ ենթարկվել է ախտահանաբանական փորձաքննության, որով չեն արձանագրվել բացասական արդյունքներ, երբ սահմանված կարգով փաթեթավորված և մակնշված է, երբ առկա է դրա անվտանգությունը հաստատող փաստաթուղթ: Ընդ որում, նշված պահանջներն իրենցից ներկայացնում են սանիտարական կանոններ, որոնց պահպանումը պարտադիր է պետական և տեղական ինքնակառավարման մարմինների, պաշտոնատար անձանց, ինչպես նաև իրավաբանական և ֆիզիկական անձանց համար: Ասվածը նշանակում է, որ այդ պահանջները պետք է հաշվի առնվեն նաև գնումների գործընթացում, այսինքն՝ գնման առարկա կարող է լինել բացառապես այն ախտահանիչ միջոցը, որը համապատասխանում է վերոնշյալ պահանջներին, քանզի հակառակ պարագայում այն ձեռք բերող պատվիրատուն չի կարողանալու ապահովել վերոնշյալ իմպերատիվ պահանջները՝ դրանից բխող բոլոր անշահավետ հետևանքներով հանդերձ: Նշվածը նշանակում է նաև, որ գնման ընթացակարգի կազմակերպիչը /պատվիրատուն/ չի կարող գնման ընթացակարգ հայտարարել հիշյալ պահանջներին չհամապատասխանող ախտահանիչ միջոցներ ձեռք բերելու համար կամ ձեռք բերել դրանք, հակառակ պարագայում ոչ միայն կխախտվեն հիշյալ իրավանորմների պահանջները, այլև դրանց չհամապատասխանող ախտահանիչ միջոցների օգտագործումը կարող է հանգեցնել լրջագույն առողջապահական խնդիրների՝ հաշվի առնելով դրանց՝ ախտահանաբանական փորձաքննության ենթարկված չլինելը և դրանց անվտանգությունը հաստատող փաստաթուղթ չունենալը: Պարզից էլ պարզ է, որ պետությունը հիշյալ պահանջները սահմանել է՝ նպատակ հետապնդելով ապահովելու մարդկանց առողջությունը,

շրջակա միջավայրի անվտանգ լինելը, իսկ ախտահանիչ միջոցներ ձեռք բերելու գնման ընթացակարգ հայտարարած ցանկացած սուբյեկտ, որը հետագայում օգտագործելու է դրանք, պարզապես չի կարող հաշվի չառնել գնման ներկայացված ախտահանիչ միջոցների համապատասխանությունը վերոնշյալ իմպերատիվ պահանջներին:

Մինչդեռ նշենք, որ Ընթացակարգի շրջանակներում տեղի է ունեցել լրիվ հակառակը: «Լեյկո» ՍՊԸ-ն գնման է ներկայացրել «Լեյկոսեպտ» մաշկային հականեխիչ ախտահանիչ միջոցը, որն անցել է համապատասխան ախտահանաբանական փորձաքննություն, ունի անվտանգությունը հաստատող փաստաթուղթ՝ ի դեմս ՀՀ առողջապահության նախարարի՝ «Լեյկոսեպտ» մաշկային հականեխիչ ախտահանիչ միջոցի կիրառման հրահանգը հաստատելու մասին» 06.10.2020թ.-ի թիվ 3494-Լ հրամանի (կցվում է սույն բողոքին), սահմանված կարգով փաթեթավորված և մակնշված է, այսինքն՝ համապատասխանել է օրենսդրությամբ սահմանված պահանջներին և որպես այդպիսին՝ կարող էր ներկայացվել գնման: Սակայն Ընթացակարգի 10-րդ չափաբաժնի մասով ընտրված մասնակից ճանաչված «ՎԱՆ-ՉԱՐՏԵՐ» ՍՊԸ-ն գնման է ներկայացրել ախտահանիչ միջոց հանդիսացող ալկոզել, որի մասով առկա չէ որևէ ապացույց առ այն, որ այդ ալկոզելն անցել է ախտահանաբանական փորձաքննություն և ունի դրա անվտանգությունը հաստատող փաստաթուղթ՝ ՀՀ առողջապահության նախարարի հրամանով հաստատված ախտահանիչ միջոցի կիրառման հրահանգ, սահմանված կարգով փաթեթավորված չէ: Հատկանշական է, որ նշված ընկերության ներկայացրած ալկոզելը շուկայականի համեմատ եղել է ավելի էժան, և որ ամենագարմանայի է, գնահատող հանձնաժողովը, անտեսելով վերոնշյալ իմպերատիվ պահանջները, թույլատրելի է համարել նշված ալկոզելի՝ գնման ներկայացումը և դեռ ավելին, որոշել է գնել հենց «ՎԱՆ-ՉԱՐՏԵՐ» ՍՊԸ-ի ներկայացրած ալկոզելը: Այն, ինչ տեղի է ունեցել Ընթացակարգի շրջանակներում, վերոնշյալ իրավանորմերի կոպիտ խախտում է՝ արտահայտված դրանց իմպերատիվ պահանջների անտեսմամբ: «ՎԱՆ-ՉԱՐՏԵՐ» ՍՊԸ-ի ներկայացրած ալկոզելը չէր կարող գնվել Պատվիրատուի կողմից՝ օրենսդրությամբ այդ ապրանքին ներկայացվող պահանջներին չհամապատասխանելու պատճառով, հետևաբար «ՎԱՆ-ՉԱՐՏԵՐ» ՍՊԸ-ն ընտրված մասնակից է ճանաչվել ոչ իրավաչափորեն՝ հիշյալ իրավական ակտերի պահանջների անտեսման պայմաններում, այլ կերպ ասած՝ Ընթացակարգի 10-րդ չափաբաժնի մասով «Վան-Չարտեր» ՍՊԸ-ին ընտրված մասնակից ճանաչելու մասին գնահատող հանձնաժողովի 26.01.2022թ.-ի նիստի (թիվ 4 արձանագրություն) որոշումն իրավաչափ չէ և ենթակա է դադարեցման, ինչով պայմանավորված՝ իրավաչափ չէ նաև Ընթացակարգի 10-րդ չափաբաժնի մասով «Վան-Չարտեր» ՍՊԸ-ի հետ պայմանագիր կնքելու մասին գնահատող հանձնաժողովի որոշումը:

Ընդ որում, «Վան-Չարտեր» ՍՊԸ-ի ներկայացրած ալկոզելի՝ հիշյալ իրավական ակտերի պահանջներին չհամապատասխանելու վերաբերյալ մեր գնահատականները ներկայացվում են ոչ միայն Ընկերության իրավունքների և օրինական պաշտպանության նկատառումներից ելնելով, այլ նաև առաջին հերթին կարևորելով հատկապես այդպիսի ապրանք ձեռք բերելու արդյունքում հնարավոր առողջապահական հետևանքները կանխելու անհրաժեշտությունը՝ սույն բողոքի հիմքով Ընթացակարգի 10-րդ չափաբաժնի մասով պայմանագրի կնքման գործընթացը կասեցնելով և չթույլ չտալով այդ ալկոզելի օգտագործումը պացիենտների

շրջանում, քանզի դրա անվտանգ լինելու մասով որևէ ապացույց առկա չէ և հաշվի առնելով ներկայիս համաճարակային իրավիճակը՝ պայմանավորված նոր կորոնավիրուսային վարակի առկայությամբ:

Վերոգրյալ ամբողջի հիման վրա, ղեկավարվելով «Գնումների մասին» ՀՀ օրենքի 37-րդ, 46-րդ և 50-րդ հոդվածներով՝

### ԽՆԴՐՈՒՄ ԵՆՔ

Պարտավորեցնել «ՀԱՊԱԿ-ԳՀԱՊԶԲ-22/06» ծածկագրով գնանշման հարցման ընթացակարգի գնահատող հանձնաժողովին ընդունել որոշում՝

1. նույն հանձնաժողովի՝ 26.01.2022 թվականի հայտերի բացման և գնահատման նիստի (թիվ 4 արձանագրություն) որոշումը մասնակի՝ նույն ընթացակարգի 10-րդ չափաբաժնի մասով «Վան-Չարտեր» ՍՊԸ-ին ընտրված մասնակից ճանաչելու մասով դադարեցնելու վերաբերյալ,
2. պայմանագիր կնքելու որոշումը մասնակի՝ նույն ընթացակարգի 10-րդ չափաբաժնի մասով «Վան-Չարտեր» ՍՊԸ-ի հետ պայմանագիր կնքելու մասով դադարեցնելու և գնման ընթացակարգը 10-րդ չափաբաժնի մասով չկայացած հայտարարելու վերաբերյալ:

Կից ներկայացվում են՝

1. Բողոքարկման վճարը վճարելու վերաբերյալ ապացույց,
2. «ՀԱՊԱԿ-ԳՀԱՊԶԲ-22/06» ծածկագրով գնանշման հարցման ընթացակարգի գնահատող հանձնաժողովի՝ 26.01.2022 թվականի հայտերի բացման և գնահատման նիստի թիվ 4 արձանագրության պատճենը,
3. ՀՀ առողջապահության նախարարի՝ «Լեյկոսեպտ» մաշկային հականեխիչ ախտահանիչ միջոցի կիրառման հրահանգը հաստատելու մասին՝ 06.10.2020թ.-ի թիվ 3494-Լ հրամանի՝ Իրտեկ տեղեկատվական համակարգից արտատպված տարբերակը,
4. Քաղվածք իրավաբանական անձանց պետական ռեգիստրի գործակալությունից:

Ընթացակարգին վերաբերող մյուս բոլոր՝ սույն բողոքին չկցված նյութերն ու փաստաթղթերը հրապարակված են տեղեկագրում:

«ԼԵՅԿՈ» ՍՊԸ-ի տնօրեն՝

ԳԱԳԻԿ ԱԼԵՔՍԱՆՅԱՆ /



10.02.2021թ.

